

昌化縣志卷之九

人物志

名賢

宋符確沈靜好學博通經史平居常以天下事自任
守韶化二郡有善政祀鄉賢祠

趙荆字道授昌化人生時父夢一道人以手簡書
荆字授之因以爲名焉先是大觀中同邑符確登
薦荆嘗勵志歎曰吾他日不如符先輩非人也紹
興甲戌中南省第鄉人莫不歆羨以爲有志者事
竟成初天聖間丁謂過昌化嘗爲其家擇地云後

昌化縣志

卷九

名賢

一

必有登桂籍者至荆果然

阮通志

後淳熙中官至朝奉卽欽高二州判官老能戒得
以廉幹著名

黃通志

孝友

文侯封生平事親最謹父有疾大便結燥不下公以手探缸門而接矢焉

史其全國學生邑墩頭村人二歲矢怙八歲時詢知號泣三日不止聞者罔不流涕母年七十患癰成痢半年不愈捧嘗湯藥未敢廢離常取母衣褲而親浣之時人以爲難有堂嫂孀居賴贈錢米以度活遠近咸樂稱之公子綱今已入泮食餼

陳建正邑長山村人與弟廩生建邦至相友愛弟有疾爲親捧湯藥未嘗廢離及弟歿視姪猶子人無

間言

鍾國勲邑處士性極孝友至今稱之

以上均本採訪

篤行

吳人俊貢生品行端方

蘇漢清貢生恩平縣教諭制行以忠正聞

鄒光德貢生三水縣教諭品學足爲士林矜式

蘇士卿貢生廉靜寡欲

謝士魁邑廩生品行端正

麥如桂貢生一生忠直

許光典貢生品行廉潔

鍾文會貢生選徐聞縣訓導學有本原

李何茂貢生老成鍊達士林宗之

昌化縣志

卷九

篤行

三

周國明貢生兩任海康縣訓導多善政士林思之

陳玉書貢生長任長甯新甯縣訓導教士有方

陳建中貢生守正不阿非公事不到公庭鄉人以靜贈之

陳丕謨貢生一生是非不入耳捐館之日復甦講明喪禮三日而後逝鄉人贈之曰端

陳象賢貢生品行端方學問優長闔邑士林多出其門

黃海明貢生崇尚理學鄉里稱爲純儒

陳丕緯長山村人宗族鄉黨以賢能大老表其門至

今稱之

唐奎光貢生有文有行教育勤懇

陳璣貢生邑訓導重其品特以信義二字贈之

陳士甲貢生尊師重道樂育爲懷

陳三典邑增生好學勤教

陳德華邑附生孝親信友力學安貧

湯克剛貢生有才能凡遇地方公事鄉人咸稱其介

鍾載華貢生克承父志閉門課徒一生不履公庭

鍾錫榮貢生恃寡母食貧茹苦撫育人懃懃勉學

一生不違母訓

昌化縣志

卷九

篤行

四

董志道貢生生平好善廉介可風

郭長安邑廩生老成公正鄉隣及黎崗不平之事一

經排解無不帖服

周文中邑廩生家貧力學咸稱其有型于之化

吉文炳貢生候選教諭遽理學重文教一時英俊多

出其門

文安宇貢生品端學粹盡心教育爲闔邑之望

林秀英德圖人歲貢生忠厚和平性極孝友凡憐

貧恤孤之事不遺餘力鄉隣紛爭一經投訴排解

無不帖服有謝之者必正色拒之子樹德增貢生

樹敏廩膳生孫映桂映馨同遊泮水公均及見之
人成以爲福報云

林 栻英德圖人疏財仗義同治初年感恩黎匪出
外滋擾幾釀巨患公恐貽害地方周旋其間極力
排解捐資無算其事遂寢生平尤多隱德三子均
列膠庠光緒丁酉季子天嶷遂登賢書開

國朝鄉薦之首實公之積累有以啟之也

郭元贊廩生品正行端尤好施與隣之孤子貧不能
婚公竭力玉成無德色寒儒有不能赴試者恒飲
助之士林稱誦不絕於口鄉里至今有地方不可

昌化縣志

卷九

篤行

五

無此人之語其見思如此

以上均
本採訪

卓行

黃錫科英德墩頭村人和平忠厚濟困扶危尊師重道凡有設館於其村者必捐增脩俸鄉里不能完娶者代完有二貧鄰鬻子償負公解囊贖之其之嗣賴以不絕後享壽八十蒙

恩詔賜九品現其孫錦雲錦繡皆食廩餼公之貽澤孔長矣

黃魁斗邑耆老性廉介好施與邑有德義橋久病涉公傾囊捐建人甚便之

周廷綸邑文童小試屢列前茅氣甚豪邁同治十三

年間海盜犯境親率鄉民擒獲盜首七人由縣稟

請府道獎勵至今竒之

以上本採訪

節孝

張氏生員孫廣學妻宏治辛酉符南蛇亂夫婦被掠至崗賊欲置張他所張正色曰即死吾夫婦同穴可也何他往耶賊怒出廣學殺之張抱夫屍號哭罵不絕口亦被害

陳氏百戶榮長女贅本衛前所千戶舍人溫瀾爲壻時符南蛇亂陳與三子並一女年十三俱被執陳度不免厲聲罵曰我家婦豈受犬彘污哉奪賊刀先殺其女乃自刎

沈氏生員吳曰巽妻武宣教諭沈心融女年二十寡

昌化縣志

卷九

節孝

七

苦志守節壽八十二順治九年署縣徐斌暉詳院賜匾曰柏舟繼美每月給米贍之

以上本舊志

王氏張萬全之妻年二十七歲夫故立志撫孤孤天氏痛幾失明歷苦節三十五年今壽六十五歲食貧居賤依女度日人皆敬且憐之

林氏倪成二之妻年二十八歲夫故撫孤成立歷苦節三十二年享年六十二卒

文氏林朝宏之妻年二十五歲夫故撫孤成立歷苦節三十五年 年六十卒

林馬氏邑附生林開甲之妻二十九歲夫故立志撫

孤至於成立年七十八歲卒計苦節四十九年
周林氏邑廩生周文中之妻年二十九歲夫故矢志
柏舟禦貧無怨年八十六歲卒計苦節五十七年
子三長廷綸以捕盜功賞六品頂戴次廷縉增生
三廷紳附生皆能成立氏苦節爲不朽矣

以上本
採訪

方伎

陳虞緒邑廩生誠樸無文學明義利讀東坡六無帖而獨重病無醫一語究心岐黃全活甚眾

郭元任貢生人品端正星學精通晚年廢書推算無有差忒闔邑宗之

柏松年邑廩生深知大義明星學通地理鄉人有求者惟盡其所長不取值

陳志燦貢生生平忠信精於地理子孫多蒙其澤
陳晃彪人品端方地理精通縣尹舉爲約正額爲善

最樂以表其廬

以上均本採訪

藝文

洪武二年十一月宣諭海南

蓋聞古先聖王之治天下也一視同仁無間遠近況
海南海北之地自漢以來列爲郡縣習禮義之教有
華夏之風者乎項因元政不綱羣雄並起朕舉意除
暴所向廓清師臨南粵而爾諸郡不煩於傳檄奉印
來歸向慕之誠洵可嘉尙今遣使者往諭朕意爾其
益盡乃心以輯寧其民爵賞之錫當有後命

勞海南衛

南溟之浩瀚中有竒甸方數千里歷代安天下之君

昌化縣志

卷九

藝文

十

必遣仁勇者戍守地居炎方多熱少寒時忽瘴雲埋
樹若非仁人君子豈得而壽耶卿等率壯士連歲戍
此朕甚念之

重建治平寺碑記

國朝昌化
令陶元淳
常熟人

東坡先生自昌化雙溪館下步尋溪源至治平寺賦
詩二章以王梅溪詩注徵之雙谿館在縣治前考宋
縣在今之昌化村谿水發源五指經德霞枕水岡而
下至縣之東境分爲南北二流故曰雙谿坡公自館
下步尋溪源至治平寺又在東大約溪水分流之所
其遺趾也今其地皆黃沙白草詢之土人僉曰此故

良田明初橫罹水患城邑遷改無復一畝存者而今賦額未除縣坐此蕭條吾聞言嗟歎行求所謂雙谿館治平寺者了不可得亦莫有知其名者蓋古蹟淪廢已三百年矣吾將欲復之而未遑也谿北雲谷虛冷林水深秀望之若圖畫其中隙地一區泉甘土腴榛莽旣闢豁然天開意境迴別不復知爲昌土也吾以今城磧鹵不可居民建議築堡於此爲保聚安集之計遣人伐材於山召工於府一切不費於民立廡字五層爲室二十一間中一層覆以陶瓦前後各二層則竹木茅草而已功未成而余將去官憚其志之

不遂也尉來告我曰夫節序朝賀明有敬也今

御座雖設而未有奉安之所不得爲敬吏趨而進曰州縣積貯備凶荒也今轉輸旣多而未有蓋藏之利不可爲備行旅之出於其塗者休車雨中曰水潦方降已病涉也仕宦之阻於是溪者徘徊道左曰侯館不立無即次之安也嗟夫此皆先生之政載在月令掌諸侯人設官以董之及時以課之者也而今故若是乎自置縣以來制度亦屢新矣而鄙僿如故有其舉之而復廢之抑廢之而不復舉耶無亦賦額虛懸百物凋耗故陵夸衰廢併古蹟而俱湮也今欲復之又恐

重勞吾民吾奚忍哉尉曰請改宇爲佛寺而以其中
奉安

御座旁爲困倉其以餘休行旅一舉而數利附焉繼自今
以往鳩我民而保聚之安集之特易易耳余曰善楚
人陳國龍素善士請捐貲財盡易以瓦增置屋宇延
僧董修其中且乞寺額余惟名賢之遺跡不可久湮
向固欲復之而未逮今因公家之事以致其懷古之
思而又利益於地方則斯寺之額舍治平無可者於
是伐石立碑爲之記以遺之及余未去鳩工以潰於
成民雖勞力可已矣意更欲復雙谿館祀坡公於中

昌化縣志

卷九

藝文

十二

而力不能逮則以俟後之君子

平黎記

王佐

宏治十四年夏儋州七方尙黎符南蛇倡亂環海州
縣尙黎皆應之攻儋州臨高昌化縣陷感恩縣抗拒
官軍恣行劫掠撼動海外三千里地巡撫大臣上其
事天子震怒特命鎮守兩廣征蠻將軍太子太保伏
羌伯毛爲大將帥師討賊欽差總鎮兩廣太監王公
監其軍副將以下連帥五偏裨將軍以下以十百而
兩廣官校暨漢達軍狼土兵以十萬十五年冬腊王
師駐瓊謀於有眾咸曰賊之渠魁擁眾七方眾號十

萬地險兵銳勢難卒滅而三州外應強黨以倍每分軍勢稍延數日則師老萬山之下今賊首內自相仇關防內變必不敢遠出兵當先從事外應者翦其羽翼以孤其勢然後併力進取侯皆不可獨奮然曰王師天威也震霆不及掩耳宜先搗巢擒其渠魁以號令四方則後百崙之羣醜氣奪膽落惟師所向成擒耳即日戒嚴啟行晝夜兼程是月癸亥王師壓儋拒賊巢三舍而近乃誓師曰明日甲子出兵越十日不獲賊首符南蛇頭來獻者副將以下不用命國有常法偏裨校卒軍令具在眾咸凜凜恭命是日分布將

軍以進取路以新場海田頭寨賊之北門中堅所在參將馬澄將中軍以兩廣漢達軍狼土兵一萬攻中堅蓬墟抱吉賊之右臂援黨所聚都指揮錢璋將右軍軍之部分如中軍以攻於右落基落窰賊之左臂援黨所由都指揮馬義將左軍軍之部分如中軍以攻於左西南賊路衝要則昌化古鎮州付之熟地利指揮周遠軍之部分視中軍之半至若安海西通交趾防賊走路則以總督備倭都指揮張鐸領雷瓊軍民兵習水戰者以舟師防待焉臨高澄邁瓊山定安四縣外應之賊則付之知府石璧同知鄧槩分地責

其成功而藩臬胡方王管則總攝內外綱領嚴飭諸路進兵將校及督并四縣分地守牧遠近有嚴糧餉四集文武既各任責而大將則主旗鼓出號令監軍臨之節制凜凜越三日丙寅中軍克新場海破田頭寨賊失所據險諸路軍一時竝進賊之援黨皆未及期南蛇獨擁精銳出敵昌化軍指揮周遠當與死戰短兵所接手斬賊將先鋒一人賊氣奪小却長兵爭前勁弓齊發南蛇中箭敗走赴水死別將隔水得其頭即日來獻是日中軍進據七方擒賊妻孥焚其廬沼其宮搽戮其親族黨與無噍類號令四出不移日

昌化縣志

卷九

藝文

十四

威振海外三州外應賊黨以次削平州西之賊西至昌化感恩崖州皆以次平州東之賊東至臨高澄邁瓊山定安萬州皆以次平卒如侯之所料不再越月而班師奏凱海南地方大定父老垂白扶杖相賀於閭里商賈相賀於道路農夫相賀於南畝士夫相賀於庠序咸曰自謂吾人稍延數月不死殆將盡爲犬豕輩所魚肉矣孰知今日之更生而復見太平也粵稽載籍海南自入職方以來至今千六百年重辱王師征討僅此兩見昔漢武元鼎五年始以王師創定海南者前伏波將軍邳離路侯也兩漢六朝以至於

今再以王師繼定海南者今征蠻將軍伏羌毛侯也
後伏波新息侯特以隔海立縣招撫功未嘗一卒渡
海至今兩伏波猶均廟食海南况伏羌哉又况伏羌
以師保公孤之尊而出入將帥之事尤非邳離之比
吾知後之視今亦猶今之視昔將復優焉可知也書
此以待他日秉史筆者庶得採其實焉

勅報督撫臣奏瓊黎歸化 雍正八年

上諭生黎誠心向化願附版圖朕念其無田可耕本不忍
收其賦稅但既傾心依嚮若將丁銀全行豁免恐無以
達其輸誠納貢之悃忱將遞年每名輸納丁銀二分二

昌化縣志

卷九

藝文

十五

釐之數減去一分二釐止收一分以作徭賦地方文武
大臣時時訓飭所屬有司員弁等加意撫綏悉心教養
務令安居樂業各得其所以副朕胞與地方之至意

勅開墾瓊州荒地 乾隆十八年

上諭內閣據廣東巡撫蘇昌等奏稱瓊州爲海外瘠區貧
民生計維艱查有可墾荒地二百五十餘項請照高雷
廉之例召民開墾免其陞科等語著照該撫等所請查
明實係土著貧民召令耕種免其陞科給與印照永爲
世業仍督率所屬妥協辦理庶土無遺利俾該處貧民
得資種植

到昌化軍謝表

宋 蘇軾

今年四月十七日奉被告命責授臣瓊州別駕昌化軍安置臣尋於當月十九日起離惠州至七月二日已至昌化軍者並鬼門而東驚浮瘴海以南遷生無還期死有餘責伏念臣頃緣際會偶竊寵榮曾無毫髮之能而有邱山之罪宜三黜而未已跨萬里以獨來恩重命輕咎深責淺此蓋伏遇陛下堯文炳煥湯德寬仁赫日月之照臨廓天地之覆育譬之蠕動稍賜矜憐俾就窮途以安餘命而臣孤老無託瘴癘交攻子孫痛哭於江邊已爲死別魑魅逢迎於海上豈

昌化縣志

卷九

藝文

十六

許生還念報德之何時悼此心之未已俯伏流泣不知所云

記峻靈王廟碑

蘇軾

古者王室及大諸侯皆有寶周有琬琰大玉魯有夏后氏之璜皆所以守其社稷鎮其人民也唐肅宗之世有比邱尼若夢恍惚見上帝得八寶以獻諸朝且傳命曰中原兵久不解腥聞於天故以此寶鎮之即改元寶應以是知天亦分寶鎮世也自徐聞渡海歷瓊至儋耳又西至昌化西北有山秀峙海上石峰巉然若巨人冠帽西南向而坐者里人謂之山落膊而

後漢之世封其山神鎮海廣德王五代之末南彝有
望氣者曰是山有寶氣上達於天艤舟其下斲山發
石以求之是夜大風浪駕其舟空中碎之石峰之右
彝皆溺死儋之父老猶有及見敗船於山上者今猶
有釘石存焉耳天地之寶非人所得睥睨者晉張華
使其客雷煥發豐城獄取寶劍佩之終以遇禍坐此
也今夫此山之上上帝賜寶以奠南極而貪昧無知
之彝欲以力取而已有之其誅死宜矣元豐五年七
月詔封山神爲竣靈王用承議郎彭次雲之請也紹
聖四年七月瓊州別駕蘇軾以罪譴於儋至元符三

昌化縣志

卷九

藝文

十七

年五月詔徙廉州自念謫居海南三載飲鹹食腥凌
暴颶霧而得生還者山川之神實相之謹再拜稽首
西向而辭焉且書其事碑而銘之山有石池產有紫
鱗里人不敢犯石峰之側有荔枝黃柑得就食持去
即有風雲之變銘曰瓊崖千里塊海中民彝雜居古
相蒙方壺蓬萊此別宮峻靈獨立秀且雄爲帝守寶
甚嚴恭庇蔭嘉穀歲屢豐大小逍遙逐蝦龍鷓鴣安
棲不避風我浮而西今復東碑銘赫然照無窮

附重立峻靈王廟小記

張三光

昌江志載東坡先生峻靈王廟記云漢之世封其山

神鎮海廣德王而竣靈王之號封自何代何年顧闕
畧無稱焉余覽而竊怪之意先生博綜今古豈其徵
遠遺近必有脫簡無疑迨考居僖錄及僖州所載皆
然恨先生全集遠未能携無從是正也頃因驅斥礦
盜欲絕其易種之患憶先生爲帝守寶之言祈王陰
殛舉記中誅死南彝事以請諸生王之佐見予文稿
恍然感觸忽來告曰蘇學士碑石今仆昌江獨村幸
尙無恙公得無意乎余初謁王廟即詢先生碑記絕
無知者聞之喜躍於是命彼倌人亟輦以來諏吉而
豎之王廟之中試錄石上文讀之有元豐五年七月

詔封山神爲峻靈王用部使者承議郎彭次雲之請
也二語令余夙疑頓釋爰取志書僖錄叅對並紹聖
四年七月共少二十七字蓋元豐五年亦七月兩七
月字相同當時書人一時誤看失簡遂致脫落耳計
王之膺封閱十五年而先生謫於此又閱三年先生
徙廉州辭王而撰此文又閱二十八年昌令何公請
祈公書而刻之石縣治時在昌江二洲中獨村近縣
定是王廟故址又閱七十八年縣徙今治王廟亦徙
峻靈山之隈而碑乃埋荒草深沙中矣又閱一百三
十八年而後乃今始得復歸王廟夫僞朝之封王弗

歆也宋秉正朔其封號至今尙之已經明賢次述而反脫落於流傳之記載倘王之所養養不慊者宜其默啟予心而逗漏筆端以作之合而詔諸世也不然遐荒之域誰得讀先生全集即嚶嚶好古者不過折衷儋昌兩志止耳峻靈所由封毋乃竟湮滅不彰乎嗟呼是碑之隱見說者以爲觀古蹟之晦明庸詎知吃緊傳在此二十七字耶余特表而揭之以著王靈如此

真一酒歌

並叙酒以米麥水三者爲之

蘇軾

布筭以步五星不如仰觀之捷吹律以求中聲不如耳齊之審鉛水以爲藥策易以候火不如天造之真

昌化縣志

卷九

藝文

十九

也是故神宅空樂出虛躅鞠者以氣升熟能推是類以求天造之藥乎於此有物其名曰真一遠遊先生方治此道不飲不食而飲此酒食此藥居此堂予亦竊其一二故作真一之歌其詞曰

空中經莖插天茫不生沮澤生陵岡涉閱四氣生六陽森然不受螟與蝗飛龍御月作秋涼蒼波改色屯雲黃天旋雷動玉塵香起搜十裂照坐光跏趺牛噍安且詳動搖天闕出瓊漿壬公飛空丁女藏三伏遇井了不嘗釀爲真一和而莊三杯嚴如侍君王湛然寂照非楚狂終身不入無功鄉

乳泉賦

蘇軾

陰陽之相化天一爲水六者其壯而一其穉也夫物老死於坤而萌芽於復故水者物之終始也意水之在人也如山川之蓄雲草木之含滋漠然無形而爲往來之氣也爲氣者水之生而有形者其死也死者鹹而生者甘甘者能往能來而鹹者一出而不復返此陰陽之理也吾何以知之蓋嘗求之於身而得其說凡水之在人者爲汗爲涕爲洟爲血爲澀爲淚爲涎爲沫此數者皆水之去人而外驚然後肇形如有物皆鹹而不能返故鹹者九而甘者一 一者何也華

池之真液下湧於舌底而上流於牙頰甘而不壞白而不濁宜古之僊者以是爲金丹之祖長生不死之藥也今夫水在天地之間者下則爲江湖井泉上則爲雨露霜雪皆同一味之間是以變化往來有逝而無竭故海舟之泉必甘而海雲之雨不鹹者如涇渭之不相亂河濟之不相涉也若夫四海之水與凡出鹽之泉皆天地之氣也故能殺而不能生能稿而不能浹也豈不然哉賦曰吾謫居儋耳卜築城南隣於司命之宮百井皆鹹而醪醴重乳獨發於宮中給吾飲食酒茗之用蓋沛然而無窮吾嘗終夜而起絜瓶

而東有月落之相隨無一人而我同汲者未動夜氣
方歸鏘瓊佩之落谷灑王池之生肥吾三嚙而遄反
懼守神之訶譏却五味而射六塵悟一真而失百非
信飛仙之有藥中無主而何依渺松喬之安在猶想
像於庶幾

颶風賦

蘇 過

仲秋之夕客有扣門指雲物而告予曰海氣甚惡非
稔非祥斷霓飲海而北指赤雲夾日而南翔此颶風
之漸也子盍備之語未卒庭戶蕭然稿葉蔌蔌驚鳥
疾呼怖獸辟易忽野馬之快驟矯退飛之六鷁襲土

囊而暴怒掠眾竅之叱吸予乃入屋而坐斂衽變色
客曰未也此颶之先驅爾少焉排戶破牖殞瓦擗屋
礮擊巨石操援喬木勢翻渤澥響振坤軸疑屏翳之
赫怒執陽候而將戮鼓千尺之清瀾翻百仞之陵谷
吞泥沙於一卷落崩崖於再觸列萬馬而並驚潰千
軍而爭逐虎豹讐駭鯨鯢犇蹙類鉅鹿之戰敷聲呼
之動地似昆陽之役舉百萬於一覆予益爲之股慄
毛聳索氣側足夜拊榻而九徙晝命龜而三卜盖三
日而後息也父老來啗酒漿羅列勞來僮僕俱定而
說理草木之既偃輯軒檻之已折補芽屋之罅漏塞

墻垣之隕缺已而山林寂然海波不興動者自止鳴者自停湛天宇之蒼蒼流孤日之熒熒忽悟且嘆莫知所營嗚呼大小出於相形憂喜因於相逼昔之飄然者若爲巨耶吹萬不同果足怖耶蟻之緣也吹則墜蚋之集也呵則舉夫噓呵曾不能以振物而施之二虫則甚懼鵬水擊而三千搏扶搖而九萬彼視吾之惴慄亦爾汝之相筦均大塊之噫氣奚巨細之足辨陋耳目之不廣爲萬物之所變且夫萬象起滅衆怪炫耀求髣髴於過耳視空中之飛電則何之所謂可懼者實耶虛耶惜吾知之晚也

伏波廟碑記

蘇軾

漢有兩伏波皆有功德於嶺南之民前伏波邛離路侯也後伏波新息馬侯也南越自三代不曾有秦雖遠邇置吏旋復爲彝邛離始伐滅其國開九郡然至東漢返側二叛海南振動六十餘城漢世祖初年天下民勞厭兵方閉玉關謝西域况南荒何足以辱王師非新息苦戰則九郡左衽至今矣由此論之兩伏波廟食於嶺南均矣古今所傳莫能定於一自徐聞渡海適珠崖南望連山若無若有杳於一髮耳艤舟將濟股栗喪魂海上有伏波祠元豐中詔封忠顯王

凡濟者必卜焉某日可濟乎必告然後敢濟使人信之如度量權衡必不吾欺者嗚呼非盛德孰能如此自漢以來珠崖儋萬或置或否楊雄有言珠崖之棄捐之力也否則介鱗易我衣裳此言於當時可也自五代中原避亂之人多家如此今衣冠禮樂班班然矣其可復言棄乎四州之地以徐聞爲咽喉南北之濟者以伏波爲指南神其可不恭某以罪謫儋耳三年今獲還海北往返順風無以答神貺乃碑而銘之曰至險莫測海與風至幽不仁此魚龍至信可恃漢兩公寄命一葉萬仞中自北而南洗汝胸撫循民彝必精通自南而北端汝躬屈伸窮達正直忠生爲人英沒愈雄神雖無言我意同

昌化軍儒學記

李光

學校王政之本也自唐虞三代至治之世未嘗無學所以明人倫崇教化以長育人材而化成天下也周衰至春秋之際學校廢缺雖齊晉之國晏嬰叔向之明賢曾無一語及於學校魯熹公能脩泮宮而詩人詠歌其德鄭惟子產不毀鄉校而仲尼追稱其仁蓋古之學者以聖爲師而專師孔子則始於鄒魯之士當時諸侯雖不能盡用而四方學者翕然從之其徒

至於三千升堂入室者七十有二人疑難問答其略見於論語皆入道之門也自衛反魯然後樂正雅頌各得其所三綱五常之道賴以不絕故孟軻所謂自生民以來未有盛于夫子者又曰以子觀於夫子賢於堯舜遠矣豈迂論哉故自兩漢而下推爲素王雖天子之尊亦北面拜跪薦祭非道足爲百世師言足爲天下法疇克當之我宋之興至仁宗皇帝始詔大臣問治天下之要當時條對者咸以學校爲語熙寧元豐以及崇寧大觀繼志述事必以是爲善嗚呼盛矣皇上龍興雖遭多難而專以仁恩覆育海宇乃詔

中外謹庠序之教以設大學之制士生斯時豈非千載之遇哉海南自古無戰場靖康以來中原紛擾而此郡獨不興兵里巷之間晏然如承平時人知教子家習儒風青衿之士日以增盛郡試於有司者三百餘人舊學卑陋下偪民居頻年以來士氣不振周覽四維乃得亢爽之地於郡城之東南隅平原迤靡氣象軒豁黎阜昌江拱揖映帶得陰陽之中占一城之勝龜筮既從人謀允協由是學錄躬率諸生告於郡守陳侯適守既樂從四鄉之士莫不奔走就事富者樂於出財貧者樂於出力而宮殿益隆獲古象於名

家而廟貌增煥華冠象佩之容遠稽於鄒魯群賢列坐之次取法於上庠御書有閣講筵有堂齋祭有室什物有庫誦讀之舍列於兩廡賓客之位附近三門繚以周垣崇以列戟固足以起邦人欣慕之心增後學進修之志士有不肄業於學宮者則鄉人笑之矣自朝廷罷舍法省教官之員後生無所從學觀經者多守於俗說閱史者或不思於全文僥倖因仍以苟且近利而已今如斯學之成也士皆激昂奮勵講先王之道考六經之文梗氣遷革日趨於善而不自知教化興風俗美然後爲學之成也紹聖間蘇公端明

謫居此郡有遊城東學云云盖嘆之也今一十餘年學者彬彬不殊閩浙異時長材秀民業精行成登巍科膺臚仕者繼踵而出予雖老矣尙庶幾及見之經始於紹興辛未之春落成於明年之冬予放遂至此得與士子杖策相從霄等又皆宿學及前輩喜與逐客遊一日摳衣踵門以學記爲請念方老病廢墨硯既辭不獲因書其大畧如此紹興壬申歲冬

南寧軍記

原儋耳自前漢時始爲郡與珠崖並繼梁而隋而唐郡名更革不一既改儋耳郡爲儋州又改儋州爲昌

化郡至宋改昌化郡爲昌化軍紹定壬辰因瓊酋長王居處與本軍管下合羅黎人符先邦等構運擄時人議謂昌爲猖鬼敗亡化爲人操戈之狀昌化二字不祥以是本軍於收復後有太守孫公丹舉申其事於上端平乙未准旨改昌化軍爲南寧軍以合羅崙立爲歸姜寨南寧與萬安吉陽舊隸瓊管瓊管舊隸於桂闕若云風俗微惡民生休戚於彼實察之然一島遠隔鯨波漢刺史唐 訪皆憚於涉險宋大觀一年提形王公祖道渡海觀風謂黎地廣袤都縣稀疎奏謂立鎮州於深黎地名龍門隸邑有三曰四達曰

昌化縣志

卷九

藝文

二十六

感恩曰龍門爲附庸舊傳龍門有灘名知更盖州人常以灘聲五點後再起一點爲每更候自提刑王公去後大觀四年州亦隨廢其版籍貢賦隸之昌化軍擬宜倫縣舊用鎮州四達縣記其學舊用鎮州考試院記則此可驗自時厥後巡按者如李如崖相繼攬轡雖澄清有錄亦自瓊而止南寧吉安萬安鞭所不及伏自聖王革命薄海內外一視同仁歸附初首立嶺南海北道提刑按察司至元二十八年更爲肅政廉訪司第以海南黎獠頑冥未盡歸化是年冬闕里吉恩平章欽奉罷命督師南來征收深崙未附生黎

自瓊萬吉陽已而班師道經於此時三十年之春也
至三十一年間奏准設立海北海南道肅政廉訪司
監治凡十都海北則雷化欽廉高橫海南則瓊萬南
寧吉安然此諸州環島百嶂蟠中教化未易通行事
情未易遍察迨元貞乙未肅政訪分司諸郡刺怯林
輶車按行椽屬唐介鄧自雷而瓊臈月十九日徑入
郡境四民遮道扶老襁幼心口私賀欣欣然有喜色
而相告曰前此我儋事耳目不接但自昌化改南寧
以來迄以獲覩平章廉訪二公接踵至斯真切見也
方使節按臨之明日詣文廟致禮於先聖先賢升堂

招諸生而誨之曰凡爲士者誦而詩讀而書三綱五
常之道衣冠禮樂之懿盍相講明毋隳爾功毋廢爾
業明倫有扁揭而新之藏書有壁緝而修之學校何
其幸及觀其清簡從事不動聲色斷折公而鼠牙之
訟息勞來切而鴈澤之居安虹梁跨波驛道如砥公
廨輪奐官府儀型數十年積廢規模一旦修舉若官
若吏莫不清廉自勵由是化行俗美訟簡刑清呻吟
者謳歌塗炭者衽席熙熙然清風和氣中官吏士民
乃不謀同而辭曰前乎削平黎獠平章之功後乎宣
勸教化廉訪之德二者盛美皆合志之功且泚淪江

之清磨澗沼之白爲二公豐功茂德頌然自改昌化而南寧近六十年未有記者幸今綉衣至羅繻增輝使不封刻以詔來者則沿革事迹莫知其記矣此元貞乙未因有感端平乙未云

范惇東波祠記

先生事宋神宗紹聖間被譴謫儋州無地可屋嘗偃息城南桄榔林有銘石及元大德間郡教官購之得諸邏人之爨下遂置學宮先生居儋四年計平生所歷爲久而迄宋之世儋無祠延佑四年春僉海北海南道肅政廉訪司事大都軍行部至是乃求其偃息

之地構堂三間而象其中周以堂廡門室兩廡爲房將以處郡人子弟擇師教焉命儒者六十家奉祠事又植桄榔爲林而表之歸銘石林下祠成屬記之惇也嘗撫銘而感焉曰先生海內之士其始至儋也惟以罪焉去朝廷投荒裔極矣識與不識亦知其宜有以禦燥濕辟風雨也當時之人曾無意茲者至使居無室廬同於野處今去之數百歲宜若遠然而山川之虛城郭之圯始有改焉過之以思者曰是先生之所止也思之不足又將棟宇肖貌如欲聞見其容聲率其學人以挹其流風遺韻若然者吾亦不自知其

何心也豈古今之賢者殆有不相似與不然何若是其曠也禮曰有其廢之莫敢舉也有其舉之莫敢廢也是故無所廢而舉也舉之者賢者也是非舉者之自賢也亦以示儉之人知所闕者宜舉也祀先生亦其孰敢廢也耶夫往者不可追已叙而刻之以諗來者儋州今爲南寧軍云祐延己未夏范梈記并叙

贈昌化唐魯齋得獎勸序

士子候選京師官非繁華之縣則不喜者非也君子將以移易天下然亦有受變天下之疑陳傳良習俗移人賢者不免之說是也府州縣官今稱俗吏獄訟

錢穀周旋其間而莫能解去上官有驅使下民有仰賴能不因之而俗乎今之山州草縣大抵尙存古風繁華著名之方全然今習氣矣昌化爲瓊州府屬人田之數不滿十里不來也罷謠言從昔有之非徒有州縣之名所有僅山而草乎魯齋唐先生初晉昌化上高相去之遠何若不知自其初官以迄三年今日間或余會一會則曰孔子里仁爲美之言吾之昌化是也有喜心無愠色韓退之謂柳宗元不鄙彝柳州之民今稱柳州是宗元再造柳州也魯齋特不鄙彝柳州之民也哉魯齋二年之中順昌化之故而加之

以涵濡之養務使昌化里仁不失天與初性視蘇膠西予既樂其風俗之淳士民亦安予之拙無異也子瞻豈拙於爲政者哉天下拙刑政徹風清弊絕魯齋之爲道可知矣東萊呂氏有言入單父之野而見棄魚已知子賤之政矣入中牟之野而見馴雉已知魯恭之政矣棄魚馴雉是正孔門作用而循良功名也棄魚馴雉之外別言改事古之善覘人物者必不如是今觀魯齋之政其有出於隨昌化之故直道而行之民隨以直道安之也耶惟魯齋先以淡漠之心故有昌化而喜惟昌化素稱古朴故得魯齋而合聞之

昌化縣志

卷九

藝文

三十

昌感二縣嘉靖之末古風不無少變得有唐侯目擊道存而今也純然初習矣是魯齋之在今即柳宗元之再造柳州也唐侯因昌化而爲化變動之功不露按院聞野羅公徒舉政事之小蓋錢糧刑罰亦唐侯之所不廢聞野無及其大因諸生贈之請書之用補聞野之所未備

潘侯邵金亭碑

王誨

王子聞西海滸昌邑有神君明而飭勘踏畝澮上瞰當事減採添埃不讓慈君信父之風且城蕤綿貝偶刈獲一再利訝曰潘花復現矣俄有以邵金報也又

若畏四知者然故事軍校兌支單餉民不苦耗甚便之各科金輪享於有司潘令凜凜卻弗受視曩攝儋有卻至再三者一也闔邑爲建卻金亭亭成屬戶侯陳勳文昌吳日巽等請王子言勒不朽王子曰若令棹潮灌鄴種桑植檜乎若令營田勸學月吉日具酒食飲良淑乎若令利器有捷聲鉄船渡海懲巫投河乎若令夜不扃犬不吠相戒無訟相告無違赦乎僉曰然王子曰若令更僕雖縷其緒胡絜以卻金名亭僉曰語其林縉紳贈序中是令署事時里巷書氓所徵也與板輪擁鵠何異則又曰士起家屈首最易染

昌化縣志

卷九

藝文

三十一

指令獨否與清白不自濶爲官不受錢何異則又曰九銅落膽吻震動驚人哉令獨否與翔鸞波獸反風螟蝗何異王子曰唯唯盡矣嘻同一昌邑也彼暮夜汚其鉞此白日輸其芹同一饋金也彼憑拷掠肆苞苴此匪直急親上旦終守府同一卻金也彼天地爲始人我爲誓此下忘其有上不尸其功若令魁西粵辛苦十年行如鴛鴦也爰叙次其語歸之爲之歌曰水心澄徹花影搖光潘令之光百世流芳

南樓祠文昌帝君小記

張三光

昭代列聖作人文明丕振裔彝之區薄海之外凡戎

索以內聖教靡不霑暨學宮毋論卑陋者有率生
群萃而州處焉遐荒僻壤藉子衿以點綴聲華景色
此與中州親被聖教何異當年宣聖欲居彝浮海世
儒以謂一時感嘆之言詎知輸蹄所經精神固已沁
徹唯是裔彝之區薄海之外身或未至有不能忘情
者良願過而化之迄今在在蒸嘗於昭在上果然見
諸行事非徒託之空言也中州學宮內徃徃事文昌
帝君按帝君之神爲文章司命然則帝君文人也抑
帝君之言曰吾一十七世爲士大夫身未嘗酷民虐
吏周人之急濟人之乏容人之過憫人之孤一心如

此聽命於天然則帝君又行人也崇祀帝君正用樹
標立表使人士有所矜式將處即醇儒出即名世於
以佐揚聖教云爾俗子譎昧猥云帝君主登進之籙
意乞靈牲帛輒可躐名倖位則帝君吐之矣瓊南諸
學都不解祀文昌何況昌邑覽邑誌宋時發解登甲
不乏其人國朝永樂正統萬間亦多賢書奮起
而數科以來寥寥絕響意者矜式未聞而文行若無
標表歟帑空如洗民室如罄官舍如逆旅建祠而力
不能逮會有修城之役葺東北二樓則帝大士祠
存焉因念南樓於位爲離有文明之象且與學宮相

望倘亦帝君之所不棄也於是肖象祀之齋心諏志
偕師生而妥其神爰捐貲奉祀春秋匪懈稍述帝君
文行之概用告諸士令其見標表而知矜式庶幾修
文敦行務成醇儒名世化荒僻爲聲華莫令人笑子
矜僅點綴已也若思躡名倖位而乞靈牲帛豈余所
以期諸士亦豈諸士所自期哉

魚鱗歸戶冊小記

張三光

昌化賦役全書載通縣官民田地塘及新墾共苗四
百四十四頃二十畝有奇郡志載 治年間昌化被
水衝去額田一百一十九頃九十六畝有奇通縣戶

昌化縣志

卷九

藝文

三十三

口六百八十七戶歷年實徵文冊見戶里甲止存二
百一十戶逃戶二十九戶絕戶四百四十八戶本縣
初蒞茲土告虛糧者踵相接也適孫道尊巡臨不揣
條議巨害四款首及虛糧蒙允查覈竊慮綿力勿勝
重任再四陳謝而竟不得自崇禎二年閏四月初六
日迄八月二十八日差畧報竣又再四稽討蒐隱刪
重逮十二月二十六日差有次第大抵昌民愚拙莫
諳丈法先取田形規則謄數十本每圖每甲各散一
本令轉相傳閱就中擇一二稍諳者本縣親自督率
逐坵按形指點使知運弓計步與眾演習漸習漸曉

然後分布開丈此疆彼界其經跋履或剛風刮面膚裂水流或冒雨霖身衣透如洗或午無寄炊之所自裹火米禦饑或夜無託宿之茅從人團坐露宿閱歷險阻穿度叢棘備諸艱苦有生所未嘗也包沒隱占多屬僭豪初多倔强旋亦首服然有昌民丈至本戶本田而錯愕不知爲誰氏之物者則以久失魚鱗册故也第積筭苗畝更絕無人安得不懸糶以募紙劄費亦無措悉自捐充之凡數四易稿而後成兩册脱稿即置諸公所令人人皆得寓目或有差舛皆得謁白一切至蠢至陋皆得前膝細訢朝謁則朝覈改正

夕謁則夕覈改正蓋雖支離垢穢之人襍沓嘈啞與之狎處而不忍厭也若乃豪強逞臆何能盡徇或承買絕戶包隱之田糧根本輕今丈倍昔而執稱鹹荒輒徵色發聲面肆憤憾姑婉語之曰小熟已收者荒乎見今種禾者荒乎彼應之曰否又婉語之曰然則今所丈者非已收見種者鹹荒云何彼亦不能應而去唯缺缺啣恨而已嗟嗟令之去志已決於未到之先然不以決去而拮据兩載竭盡心力者誠不敢負此殘民以負

朝廷一命也清查昌化之虛糧於言歸之令何有哉彼爲

一己不爲通邑爲一時不爲子孫不達甚矣山稅村
稅自其積習擅收存而不論以示廣大可也其他顛
末已列申文不具論關係魚鱗歸戶者計兩冊各七
本俱用縣印鈐記遇有剝補字樣俱用小印蓋記小
印或可僞爲而印色自吳中携來非此中所有恐未
易僞也後有覽者得以辨焉并目錄一冊同學博明
經諸生封識貯庫諭與庫冊同交鎖鑰令自主之毋
如曩時滅沒昌民子孫他日踐祖父遺田不致錯愕
而却步倘亦令與有微勞耳至於請豁出自

上臺豁虛出自

昌化縣志

卷九

藝文

三十五

聖恩非本縣所敢知也崇禎六年

總督兩廣熊

巡按御史錢

題爲海外虛糧遺累民間苦賠堪憐仰懇

聖慈俯賜豁免以甦子遺事看得任土作貢計戶編差此
普天率土所同然未有田已衝壓戶已盡絕而猶攤
派他戶以代賠者昌化固粵東海外窮壤也邑僅彈
丸民同魚鱉野無膏腴之壤里乏素封之家所最苦
者田近斥鹵則鹹傷地在高亢則旱傷即按寔有之
田地以供應納之賦稅猶苦追呼况以田被冲陷戶

久逃絕責二百九十一頃之見田而攤賠一百五十餘頃之虛稅以二百一十之見戶而派賠一百有零之絕丁民其堪乎乃從前縣官以額賦難蠲只多方攤派極力鞭扑以求免叅罰而不知猛虎毒蛇之喻賦愈急而民愈逃民愈逃而戶益絕捱至今日則寄寓之商戶編差土產之榔稅抵補矣歲尙缺少丁糧五百零六兩八錢七分五厘零當此事勢窮極之秋即欲再行攤派之術有萬萬不能者竊謂國家統一海宇窮髮盡入版圖即田地之或滄桑也浮生新懇槩可陞科益國則冲壓缺陷亦當除豁甦民况查大明會典內開嘉靖十五年詔各處水塌沙壓等項田地稅租負累人戶賠納曾經具奏撫按官查勘明白照例除豁此固我世宗皇帝煌煌詔旨垂之典章與天下後世所守者臣等援例以請者也用是披瀝血誠合詢拜疏伏祈

皇上垂憐海外窮民賠累已極荒陬小邑迓散可虞俯賜俞允勅下戶部將昌化縣前項虛販丁糧照例豁免臣等轉行遵照庶皇仁遐惕而子遺可甦矣奉

戶部着議具奏崇禎七年四月十七日本部尙書侯具題本月二十七日奉

旨昌化虛糧一項准與豁免

詩

題寧濟廟

蘇軾

馮洗古烈婦翁媪國於茲策勲梁武后開府隋文時
三世更險易一心無磷緇錦繖平積亂犀渠破餘疑
廟貌空復存碑版浸無稽我欲作銘誌慰此父老思
遺民不可問儂勾莫余欺爆特箇鷄卜我嘗一訪之
銅鼓葫蘆生歌此迎送詩

秀香堂

李光

山遠江深勝地藏森森喬木間修篁月林不動參差

昌化縣志

卷九

藝文

三十七

影花徑堂供自在香沉水爇牋金鴨冷落花飛盡綠
陰涼神通甚愧維摩老聊表蠻邦作醉鄉

尊賢堂

楊誠齋

先生無地隱危身天賜黎山活逐臣萬里鯨波隔希
奭千年桂酒吊靈均忠精塞得乾坤破日月半渠文
字新祇箇短簷長帽子青蓮居士謫僊人

先生流落海南涯茅屋三間不到伊幸有高堂懸畫
像更無閑客看新詩古來聖賢作如此身後功名屬
阿誰底事有年譚太守却教賓主不同時

陳正善

聞道騎鯨碧眼僊黃柑手植尙依然人間俯仰更成
古天下聲名不計年繭紙誰能收妙墨鷄林何用續
遺編使君爲荆新堂事若解尊賢即是賢

李德祐

嶺水爭分路轉迷桃榔椰葉暗蠻溪愁衝露毒逢蛇
草畏落沙蟲避燕坭五月畚田收火米三更津吏報
潮鷄不堪腸斷思鄉處紅槿花中越鳥啼

嚴維

魑魅魯爲五蓬萊近拜郎臣心瞻北闕家事在南荒

趙鼎

昌化縣志

卷九

藝文

三十八

海南飄蕩水雲飛黎婺山高日上遲千里孤光一樽
酒此情惟有故人知

題五指山

丘濬

五峯如指翠相連撑起炎州半壁天夜盃銀河摘星
斗朝探碧落弄雲煙雨餘玉筍空中現月出明珠掌
上懸豈是巨靈伸一臂遙從海外數中原

謁蘇長公祠次蔣道尊韻

曾邦泰

海中蓬島幾人從蝶夢高懸一榻容山路襯雲便載
酒香泉飄乳氣凌峯丹心奏記牽霞住綠樹緣菴襍
雨濃貌祀冷然生百感應知玉局有禪宗

自韵

無柰才竒俗不禁煙嵐海外獨披襟一時來往紛於
織總屬安閑定衷吟何處鐘聲何處盡此生亮節此
生心息軒半枕春眠外付與桄榔野鳥音

寄賀昌化新令高年翁

臨高知縣陳垂

坡公曾暫遇昌化至今稱况值神明宰方當政教行
蛋家春浪穩黎峒暮煙清地僻閒無事堂存吏隱名

奉賀昌化新令高年翁

崖州知州張擢士

芝蘭十載氣相親海外何期作德隣琴韻間調人自
玉政聲新播宇如春煦恩此日依慈母報績他年注

昌化縣志

卷九

藝文

三十九

遠臣莫謂昌江家萬里珠崖尤在水之濱

菊花

高日旦

三月菊花開滿林朝朝扶醉向亭陰時人漫語陶公
事何必東籬如稱心

招民歌附

高日旦

嗟爾昌民遭天不吊陳武造逆據城聚嘯橫罹殺戮
白日鬼叫城郭墟村堡消耗二子遺四方無告
如舟迅遊如猿窮跳骨肉離散墳墓不掃各望故鄉
飲泣痛號我蒞茲土傷心慘悼播告父老出示諭曉
猶然未聞作歌勸招極早歸來爾耕爾釣賃田樂業

不征不調助爾資財永不責報恐有相欺執此為照

戊戌二月望九日登神山極頂口占數語以紀其

實

李有益

萬石矗太空何緣得一面惜此洞中天山頂一洞四圍峭石壁立

中眠一石如榻苔綠成茵上下仙草懸生妍花倒映小憩一時令人神骨俱清真洞天仙境終古

無人見崎嶇人迹罕到中有守寶神此語洵堪傳

東坡碑記云五代時有望氣者言山有寶氣番人斷山求之云云傳言兄弟化姑妄

從古諺魚相化為石號兄弟海捕俯眺並遐觀惟少吹笙

院山頂地勢平廠石峰環抱倘築室拜問峻靈王宋元

豐五年封山神為峻靈王妙境何年現我來石有靈一嘯形神變

昌化縣志

卷九

藝文

四十

志載上有二石如人形又有石若冠帽俱非人形冠

帽惟峰前懸崖一石似之巍巍獨尊勢若搢笏朝天

故土人呼云偶然獲角沉默荷山神眷予游至洞側獲

杖二土人咸謂非我去白雲飛化作甘霖徧予下山

神賜不能獲此後漢封鎮海宣講賦以講聖諭以化愚民為韻

貢生鄒石麟

廣訓一書誠堪贊賞披讀百回殊深景仰括官禮睦

麟之意教訓軍民探典謨訓誥之精道崇親長豈獨

京師直省朔望理應申明即雖僻壤遐陬朝夕亦宜

宣講昔我

聖祖仁皇帝之有天下也作民之君受天之命地平天成仁
育義正惟期士習端方還慮民風強勁爰立綸綍之
言以復閭閻之性千萬語諄諄勸誡願億兆俗革澆
漓十六條切切指陳望羣黎學爲賢聖夫何世判古
今人乖憲度孝悌弗興農桑不務薄宗族而乖鄉黨
奢靡成風信異說以悖王綱心思自誤藐法律昧廉
恥肆誣告而子弟非爲匿逃匪抗錢糧競復仇而身
家弗顧林林總總殊多誤入於迷津熙熙穰穰大抵
未聞夫

聖諭乃有

昌化縣志

卷九

藝文

四十一

仁廉李邑侯者官甫下車治求上理爰將集要善書給發
各圖士子倣召伯循行之法處處宣揚學尼山善誘
之方循循啟齒約正值月之設彼意云何引讚代讀
之規亦良有以夫惟言之有文聽者無詐講善惡則
旁推遠引誰不勸懲講報應則援古誣今共相驚訝
雍睦何以昭愛敬何以盡戶爲曉而民志可回爭訟
何以息衣食何以豐家爲諭而農功休暇講法度以
驚其瞶保甲庶免株連講禮讓以振其聾士女各安
廬舍文言道俗人心庶可挽回善教入人風俗何難
變化爾其欽承至論敬聽嘉謨咸歸覺路共出迷途

以耕讀爲正業以勤儉爲良圖事親從兄聞徃聖昔
賢之風而生感懷刑畏法聽逆子惡婦之譴而非誣
聞一知二之餘賜也可與終日不違之下回也不愚
由是聞言生悟敬長尊親各安生理共飭人倫悟身
命之當重知稼穡之可珍父誠兄勉而還鼠牙雀角
之爭可息俗易風移之日蕩平正直之路同遵春社

烹羊共享

太平之福秋田息蜡同爲

盛世之民本採訪

昌化縣志

卷九

藝文

四十二